



JABATAN PERDANA MENTERI
AGENSI PENGURUSAN BENCANA NEGARA

SIARAN MEDIA

NADMA LANCAR MYDIMS : APLIKASI AMARAN AWAL DAN MAKLUMAT BENCANA DI HUJUNG JARI

KUALA LUMPUR, 24 April 2026 – Ketua Pengarah Agensi Pengurusan Bencana Negara (NADMA) Tuan Meor Ismail Meor Akim hari ini melancarkan aplikasi Sistem Pengurusan Maklumat Bencana Malaysia (MyDIMS) dalam sesi *walkabout* sempena Resilient Asia 2026 di Pusat Dagangan Dunia Kuala Lumpur (WTCKL).

Aplikasi MyDIMS merupakan sebuah aplikasi maklumat yang mengintegrasikan amaran dan data bencana daripada pelbagai agensi teknikal secara bersepadu. Pengguna boleh memantau status terkini jenis bencana, jumlah mangsa, serta bilangan Pusat Pemindahan Sementara (PPS) yang dibuka. Antara kelebihan utama aplikasi ini adalah keupayaannya menghantar Notifikasi Segera (*Push Notification*) untuk amaran awal bencana sekiranya pengguna berada dalam lingkungan radius 25 kilometer dari kawasan bencana, sekaligus dapat membantu perancangan dan pengurusan bencana secara sendiri dengan lebih teratur.

MyDIMS juga menyediakan Panduan Navigasi ke Lokasi PPS yang diintegrasikan dengan fungsi pemetaan digital. Pengguna MyDIMS boleh melihat status PPS sama ada masih dibuka atau telah ditutup, serta kapasiti semasa bagi memudahkan perancangan pergerakan mangsa. Selain itu, aplikasi ini turut menyediakan Pautan Dail Segera ke Talian MERS 999, bagi membolehkan tindak balas bantuan kecemasan yang lebih cepat.

Selain itu, MyDIMS juga berfungsi sebagai hab rujukan dengan menyediakan pintasan ke aplikasi mudah alih agensi teknikal lain seperti myCuaca, MyPublic InfoBanjir, MyJAS EQMS, Bencana JKR, MyIBJKM, dan myPasangSurut. Pintasan ke aplikasi-aplikasi ini memberikan kemudahan setempat kepada pengguna untuk mendapatkan perincian yang bersifat lebih teknikal. Para pengguna juga boleh menggunakan fungsi Carian Talian Kecemasan yang memudahkan pengguna mencari nombor telefon Pusat Kawalan Operasi Bencana (PKOB) negeri dan daerah, serta agensi kecemasan berdekatan seperti PDRM, JBPM, dan APM berdasarkan jarak lokasi semasa mereka.

Peluncuran aplikasi tersebut memperlihatkan satu langkah signifikan dalam memperkukuh kesiapsiagaan rakyat melalui pendigitalan pengurusan maklumat bencana yang lebih pantas, tepat dan bersepadu. Orang ramai boleh memuat turun aplikasi MyDIMS melalui Google Play Store dan Apple App Store.

-TAMAT-

**AGENSI PENGURUSAN BENCANA NEGARA (NADMA)
JABATAN PERDANA MENTERI
24 April 2026**